

Во СУББОТА 7-Й СЕДМИЦЫ ПО ПАСХЕ

В ПЯТОК ВЕЧЕРА ПЯТДЕСЯТНИЦЫ

Память совершаем всех от века усопших благочестивых христиан, отец и братьев наших.

На Господи воззвах: поставим стихов, 6.

Стихиры мученичны, осмогласника 3, глас 6-й:

Мученицы Твои Господи, не отвергошася Тебе, ни отступиша от заповедей Твоих: тех молитвами помилуй нас.

Мучившийся тебе ради Христе, многия муки претерпеша: молитвами Господи и молением их, всех нас сохрани.

Стратотерпцы мученицы, и небеснии граждане, на земли пострадавшии, многия муки претерпеша, и совершенный прияша венец на небесех, да молятся о душах наших.

И усопших, 3. Глас 8-й:

Подобен: Иже во Едеме:

От века мертвых днесь всех по имени, с верою поживших благочестно, память совершающе вернии, Спаса и Господа воспоим, просяще прилежно сим в час суда ответ благий дати, Тому Самому Богу нашему, всей судящему земли, деснаго Его предстояния получитьи в радости, в части праведных, и во святых жребии светлом, и достойным быти Небеснаго Царствия Его.

Своею кровию человеки Спасе искупивый, и смертию Твоею от смерти горькия избавивый нас, и жизнь вечную подай нам Воскресением Твоим, вся упокой Господи усопшыя благочестно, или в пустынях, или во градах, или в мори, или на земли, или на всяком месте, цари же, священники, архиереи, монахи и бельцы, в возрасте всяком всеродном, и сподоби я Небеснаго Царствия Твоего.

Из мертвых востанием Твоим Христе, не ктому смерть обладает умершими благочестно: темже молимся прилежно: рабы Твоя упокой во дворех Твоих, и в недрех Авраама, от Адама даже до днесь послужившыя Тебе чисто отцы, и братию нашу, други, вкупе и сродники, всякаго человека в житии послуживша верно, и к Тебе преставльшася, многовидно и многообразно, Боже, и сподоби я получитьи Небеснаго Царствия Твоего.

Слава: глас 8-й:

Плачу и рыдаю, егда помышляю смерть, и вижду во гробех лежащую, по образу Божию созданную нашу красоту, безобразну, безславну, не имущую вида. О чуде! Что еже о нас сие бысть таинство? Како предахомся тлению?

Како сопрягохомся смерти? Воистинну Бога повелением, якоже есть писано, подающего преставленным покой.

И ныне: Богородичен, глас 6-й:

Кто Тебе не ублажит Пресвятая Дево? Кто ли не воспоет Твоего пречистаго Рождества? Безлетно бо от Отца возсиявый Сын Единородный, Тойже от Тебе Чистыя пройде, неизреченно воплощся: естеством Бог сый, и естеством быв человек нас ради, не во двою лицу разделяемый, но во двою естеству неслитно познаваемый, того моли Чистая, Всеблаженная, помиловаться душам нашим.

Свете тихий:

Вместо же прокимна, поем: Аллилуиа: на глас 8-й:

Стих: Блажени, яже избрал, и приял еси Господи.

Стих: И память их в род и род.

Сподоби Господи:

На стиховне стихиры, глас 6-й:

Мученичен: **К**рест твой Господи, мучеником бысть оружие непобедимое: видяху бо подлежащую смерть, и предзяще будущую жизнь, надеждею в тя укрепляхуся: тех молитвами помилуй нас.

Стих: Душы их во благих водворятся.

Мертвым: **Т**ы мя почтил еси образом Твоим, руку Твоею, Спасе, создание живописавый в вещественном зраце умнаго существа подобие: егоже и общника мя поставил еси, положивый сущими на земли обладати мне самовластием слова. Темже, Спасе, рабы твоя, во стране живущих, в селениях праведных упокой.

Стих: Блажени яже избрал, и приял еси Господи.

Да мне достояние прочих живота разсудится, вертоград во Едеме всякими украшен сады, печали и попечения свободна мя причастника божественныя жизни, равноангельна на земли, смешена учинивый: темже Спасе, рабы Твоя во стране живых, в селениях праведных упокой.

Слава: глас 6-й:

Начаток ми и состав зиждительное Твое бысть повеление: восхотев бо от невидимаго же и видимаго жива мя составить естества: от земли убо тело создал еси, дал же ми еси душу Божественным Твоим и животворящим вдохновением. Темже, Спасе, рабы Твоя, во стране живущих и в селениях праведных упокой.

И ныне: Богородичен:

Молитвами рождаши Тя Христе, и мученик Твоих апостол, пророк, иерархов, преподобных и праведных, и всех святых, усопших рабы Твоя упокой.

Ныне отпускаеши: **Трисвятое. По Отче наш.**

Отпустительный тропарь, глас 8-й:

Глубиною мудрости человеколюбно вся строяй, и полезное всем подаваяй, единае Содетелю, упокой Господи души раб Твоих: на Тя бо упование возложиша, Творца и Зиждителя и Бога нашего.

Слава, и ныне: Богородичен:

Тебе и стену, и пристанище имамы, и молитвенницу благоприятну к Богу, Егоже родила еси, Богородице Безвестная, верных спасение.

И бывает отпуст.

Таже священник творит: Благословен Бог наш:

И глаголем псалом: Живый в помощи Вышняго: Аллилуиа: [Трижды].

Стих: Блажени яже избрал, и приял еси Господи:

Таже тропарь, глас 8-й:

Глубиною мудрости человеколюбно вся строяй, и полезное всем подаваяй, единае Содетелю, упокой Господи души раб Твоих: на Тя бо упование возложиша, Творца и Зиждителя и Бога нашего.

И Богородичен: глас 8-й:

Тебе и стену, и пристанище имамы, и молитвенницу благоприятну к Богу, Егоже родила еси, Богородице Безвестная, верных спасение.

Таже мертвеннии тропари, глас 5-й:

Благословен еси Господи, научи мя оправданием Твоим.

Святых лик обрете источник жизни, и дверь райскую: да обрящу и аз путь покаянием! Погибшее овца аз есмь, воззови мя Спасе, и спаси мя.

Благословен еси Господи, научи мя оправданием Твоим.

Агнца Божия проповедавшие, и заклани бывше якоже агнцы, и к жизни нестареей святости, и присносущней преставльшися, того прилежно мученицы молите, долгов разрешение нам даровати.

Благословен еси Господи, научи мя оправданием Твоим.

В путь узкий ходящий прискорбный, вси в житии Крест яко ярем взявшии, и Мне последовавши верою, приидите насладитесь, ихже уготовах вам почестей и венцов небесных.

Благословен еси Господи, научи мя оправданием Твоим.

Образ есмь неизреченныя Твоея славы, аще и язвы ношу прегрешений: ущедри Твое создание, Владыко, и очисти Твоим благоутробием, и возжеленное отечество подаждь ми, рая паки жителя мя сотворяя.

Благословен еси Господи, научи мя оправданием Твоим.

Древле убо от не сущих создавый мя, и образом Твоим Божественным почтый, преступлением же заповеди паки мя возвративый в землю, от неяже взят бых, на еже по подобию возведи, древнею добротою възобразитися.

Благословен еси Господи, научи мя оправданием Твоим.

Упокой Боже рабы Твоя, и учини я в рай, идеже лица святых Господи, и праведницы сияют яко светила: усопшыя рабы Твоя упокой, презирая их вся согрешения.

Слава: Трисиятельное единого Божества, благочестно поем вопиюще: Свят еси Отче Безначальный, Собезначальный Сыне, и Божественный Душе, просвети нас верою Тебе служащих, и вечного огня исхити.

И ныне: Богородичен: Радуйся Чистая, Бога плотию рождающая во спасение всех, Еюже род человеческий обрете спасение: Тобою да обрящем рай, Богородице Чистая благословенная.

Аллилуиа, аллилуиа, аллилуиа, слава Тебе Боже. [Трижды].

И поминает священник всех преждепочивших отец и братьев наших: и молитву.

По возгласе же псалом 50.

И абие поем настоящий мертвенный канон во усыпальнице, егоже краестрожие: Шестую припеваю отшедшим песнь.

Песнь 1. Глас 6-й:

Ирмос: Яко по суху пешествовав Израиль, * по бездне стопами, * гонителя фараона * видя потопляема, * Богу победную песнь * поим, вопияше.

В Небесных Чертозах, всегда доблии мученицы молят Тя Христе: яже от земли преставил еси верныя, вечных благ получитьи сподоби.

Украшей всяческая, животное смешение, посреде мя человека, смирения вкупе и величества создал еси: темже раб Твоих души Спасе упокой.

Слава: Рая жителя и земледельца в начале мя учинил еси, преступльша же Твою заповедь изгнал еси. Темже раб Твоих души Спасе упокой.

И ныне: Богородичен: Иже от ребра создавый Еву прежде нашу праматерь, из пречистаго Твоего чрева в плоть одевается, еюже смерти крепость, Чистая, разруши.

Песнь 3.

Ирмос: Несть свят якоже Ты * Господи Боже мой, * Вознесый рог верных Твоих Блаже, * и утвердивый нас на камени * исповедания Твоего.

Законно пострадаша Твои мученицы Жизнодавче, и венцем победы украсившися, от Тебе преставльшимся верным вечное избавление подают.

Наказав первее многими чудесы, и знаменьями мене заблуждшаго, напоследок самого себе истощил еси яко сострадатель, и поискав, обрел и спас еси.

Слава: От текущих непостоятельныя тли, к Тебе прешедшья, в селениях вечных жити радостно сподоби, Блаже, оправдав верою же и благодатию.

И ныне: Богородичен: Несть непорочны якоже Ты Пречистая Богомати, едина от века Бога истиннаго зачала еси во чреве, смерти разрушившаго силу.

Таже, ирмос: Несть свят якоже Ты Господи Боже мой, вознесый рог верных Твоих Блаже, и утвердивый нас на камени исповедания Твоего.

Таже, ектения. И седален, глас 6-й:

Воистинну суета всяческая, житие же сень и соние: ибо все мятется всяк земнородный, якоже рече Писание: егда мир приобрящем, тогда во гроб вселимся, идеже вкупе царие и нищии. Темже Христе Боже преставльшися упокой яко Человеколюбец.

Слава, и ныне: Богородичен:

Всесвятая Богородице, во время живота моего не остави мене, человеческому предстательству не ввери мя, но Сама заступи, и помилуй мя.

Песнь 4.

Ирмос: Христос моя сила, Бог и Господь, * честная Церковь * боголепно поет взываючи, * от смысла чиста о Господе празднующи.

Премудрости большее являя познание, и еже о дарех многосовершенныя Владыко благостыни, мученическия лики ангелом сочел еси.

Неизреченныя славы Твоя получитьи сподоби, к Тебе преставльшися, идеже Христе веселящихся есть жилище, и глас чистаго радования.

Слава: Поющих приими Божественную державу Твою, ихже от земли приял еси, чада света тех соделова, греховную мглу очищая Многомилостиве.

И ныне: Приятилище пречистое, храм всенепорочный, ковчег пресвятой, девственное место священства, Тебе доброту Иаковлю Владыка избрал еси.

Песнь 5.

Ирмос: Божиим светом Твоим Блаже, * утренюющих Ти души * любовию озари, молюся, * Тя ведети Слове Божий, * истинного Бога от мрака греховного зывающа.

Яко всеплодие священное, и яко начаток человеческого мученицы естества, прославленному принесшися Богу, нам спасение присно ходатайствуют.

Небесного пребывания, раздаяния дарований, сподоби Господи, прежде усопшья верныя рабы Твоя, подая прегрешений избавление.

Слава: **И**же един естеством Животворец, иже благности воистинну неизследимая пучина, скончавшися Царствия Твоего сподоби Щедре, едине Безсмертне.

И ныне: Богородичен: **К**репость и пение иже из Тебе Владычице миру Рождейся, и спасение бывый погибшим, иже от адовых врат избавляя, верою Тебе блажащия.

Песнь 6.

Ирмос: **Ж**итейское море воздвигаемое зря * напастей бурею, * к тихому пристанищу Твоему притек вопию Ти: * возведи от тли живот мой, Многомилостиве.

На Кресте пригвождаемъ, мученическия лики к Себе собрал еси, подражающыя страсть Твою, Блаже. Темже молим Ти ся, к Тебе преставленныя ныне упокой.

Неизреченною славою Твоею, егда приидеши страшный судити миру всему, на облацех благоволи светло сresti Тебе Избавителю, яже от земли приял еси верныя рабы Твоя.

Слава: **И**сточник жизни Сый, мужеством Божественным окованныя Владыко, изводяй рабы Твоя, яже к Тебе верно отшедшья, в сладости райстей всели.

И ныне: **В** землю возвратихомся, преступльше Божию заповедь божественную: Тобою же, Дево, на небо от земли вознесохомся, тлю смертную оттрясше.

Посем ирмос: **Ж**итейское море воздвигаемое зря напастей бурею, к тихому пристанищу Твоему притек, вопию Ти: возведи от тли живот мой, Многомилостиве.

Кондак, глас 8-й:

Со святыми упокой Христе души раб Твоих, идеже несть болезнь, ни печаль, ни воздыхание, но жизнь безконечная.

Икос: **С**ам един еси безсмертный, сотворивый и создавый человека: земнии убо от земли создахомся, и в землю туюжде пойдем, якоже повелел еси,

создавый мя и рекий ми: яко земля еси, и в землю отидеши, аможе вси человецы пойдём, надгробное рыдание творяще песнь: аллилуиа.

Песнь 7.

Ирмос: Росодательну убо пещь содела ангел * преподобным отроком, * халдеи же опаляющее веление Божие, мучителя увеща вопити: * благословен еси Боже отец наших.

Избавльшиися Твоею кровию мученицы первого преступления, окропившися же своею кровию, прообразуют яве Твое заклание: благословен еси Боже отец наших.

Свирепеющую смерть умертвил еси, Слове живоначальнейшее, в вере же усопшыя приими ныне, воспевающыя и глаголющыя, Христе: благословен еси Боже отец наших.

Воодушивый мя человека вдохновением Божественным, Богоначальнейший Владыко, преставленные Царствия Твоего сподоби, пети Тебе Спасе: благословен еси Боже отец наших.

Богородичен: Превышши всякия твари Пренепорочная была еси, заченши Бога, сокрушившаго смертная врата, и верей стерпаго: темже Тя Чистая песнословим вернии, яко Богоматерь.

Песнь 8.

Ирмос: Из пламене преподобным росу источил еси, * и праведнаго жертву водою попалил еси: * вся во твориши Христе, токмо еже хотети, * Тя превозносим во вся веки.

Крепко подвиги показующе, и победы венцем украсистесь, мученицы Христовы страсотерпцы, зовуще: Тя превозносим Христе во веки.

Священне житие оставльшыя верныя, и к Тебе Владыце прешедшыя приими кротце, упокоевая, яко благоутробен, Тя превозносящыя во вся веки.

Ныне в земли кротких вся водворятися прежде усопшыя Спасе благоизволи, верою яже в Тя оправдав, и благодатию Тя превозносящыя во вся веки.

Богородичен: **В**си Тя блажим Всеблаженная, рождшую Слова воистинну сущаго Блаженнаго, плоть нас ради бывшаго: Егоже превозносим во вся веки.

Песнь 9.

Ирмос: Бога человеком невозможно видети, * на Негоже не смеют чини ангельстии взирати: * Тобою бо Всечистая, явися человеком * Слово воплощенно, * Егоже величающе, * с небесными вои, Тя ублажаем.

Надежда мучеников лики укрепи, и к Твоей любви распаленней впери, будущих сим предвообразивши непоколебимый воистинну покой: егоже преставленные Блаже, верныя сподоби получитьи.

Светлаго и Божественного получить сияния Твоего Христе, верою преставльшимся благоволи, в недрах Авраамовых упоение, яко Един милостив, тем даруя, и вечного сподобляя блаженства.

Иже сый естеством благ и благоутробен, и волитель милости, и благоутробия бездна, яже от места сего озлобления, и сени смертных Спасе преставил еси, идеже сияет Твой свет, тыя учини.

Богородичен: Сень святую Чистая разумею, и ковчег, и скрижаль Тя закона и благодати: Тобою бо оставление даровася, оправданным же кровию Воплощенного из Твоего Чрева Всенепорочная.

Трисвятое: Пресвятая Троице: По Отче наш:

Таже тропарь, глас 8-й:

Глубиною мудрости человеколюбно вся строяй, и полезное всем подаваяй, единае Содетелю, упокой Господи души раб Твоих: на Тя бо упование возложиша, Творца и Зиждителя и Бога нашего.

И Богородичен: глас 8-й:

Тебе и стену, и пристанище имамы, и молитвенницу благоприятну к Богу, Егоже родила еси, Богородице Безвестная, верных спасение

И поминает священник обычно.

И отпуст.

Во СУББОТА 7-Й СЕДМИЦЫ ПО ПАСХЕ

В СУББОТУ НА УТРЕНИ

По шестопсалмии, Аллилуиа: на глас 8-й, со стихи его.

Тропарь, глас 8-й:

Глубиною мудрости человеколюбно вся строяй, и полезное всем подаваяй, Едине Содетелю, упокой Господи души раб Твоих: на Тя бо упование возложиша, Творца и Зиждителя и Бога нашего.

Слава, и ныне: Богородичен. Глас тойже:

Тебе и стену, и пристанище имамы, и Молитвенницу благоприятну к Богу, Егоже родила еси, Богородице Безневестная, верных спасение.

Таже обычное стихословие: **Р**ече Господь Господеви моему: седи одесную Мене:

На всех же ектениях стихословия и канона поминаются вси преждеотшедшии отцы и братья наша.

По 1-м стихословии глаголем:

Седальны мертвенны, и мученичны. Глас 6-й:

Страдальческая противления в подвизе, мучительныя раны на мученики: и стояху лица безплотных, почести держаще победы: удивиха премудрии мучителей и царей, низложиша велиара исповеданием Христовым. Укрепивый их Господи, слава Тебе.

Стих: **Д**ивен Бог во святых своих, Бог Израилев.

Страдальческий подвиг претерпевше святии, и почести победы от Тебе приемше, упраздниша коварства беззаконных, прияша венцы нетления: теми Боже, спаси души наша.

Стих: **В**оззваша праведнии, и Господь услыша их.

Святых Твоих память Господи, показася якоже рай, иже во едеме, в ней бо радуется вся тварь: и подаждь нам тех молитвами, мир и велию милость.

Слава, покой: **В** селениях избранных, и во стране живущих, яже приял еси Иисусе, благочестно усопшыя учини, яко благоуветливый Бог, и исполни не вечернего света, небесныя Твоя радости сподоби.

И ныне, Богородичен: **Б**лагословенную нарекий Твою Матерь, пришел еси на страсть вольным хотением, возсияв на Кресте, взыскати хотя Адама, глаголя ангелом: срадуйтеся Мне, яко обретесе погибшая драхма. Вся мудре устроивый Боже наш, слава Тебе.

Таже, Блажени непорочнии: на две статии.

Тропари мертвеннии:

Благословен еси Господи, научи мя оправданием Твоим.

Святых лик обрете источник жизни, и дверь райскую: да обрящу и аз путь покаянием! Погибшее овча аз есмь, воззови мя Спасе, и спаси мя.

Благословен еси Господи, научи мя оправданием Твоим.

Агнца Божия проповедавшие, и заклани бывше якоже агнцы, и к жизни нестареей святии, и присносущней преставльшеся, того прилежно мученицы молитве, долгов разрешение нам даровати.

Благословен еси Господи, научи мя оправданием Твоим.

В путь узкий хождшии прискорбный, вси в житии Крест яко ярем взявшии, и Мне последовавшии верою, приидите насладитесь, ихже уготовах вам почестей и венцов небесных.

Благословен еси Господи, научи мя оправданием Твоим.

Образ есмь неизреченная Твоя славы, аще и язвы ношу прегрешений: ущедри Твое создание, Владыко, и очисти Твоим благоутробием, и возжеленное отечество подаждь ми, рая паки жителя мя сотворяя.

Благословен еси Господи, научи мя оправданием Твоим.

Древле убо от не сущих создавый мя, и образом Твоим Божественным почтый, преступлением же заповеди паки мя возвративый в землю, от неяже взят бых, на еже по подобию возведи, древнею добротою возобразитися.

Благословен еси Господи, научи мя оправданием Твоим.

Упокой Боже рабы Твоя, и учини я в раи, идеже лица святых Господи, и праведницы сияют яко светила: усопшья рабы Твоя упокой, презирая их вся согрешения.

Слава: Трисиятельное единого Божества, благочестно поем вопиюще: Свят еси Отче Безначальный, Собезначальный Сыне, и Божественный Душе, просвети нас верою Тебе служащих, и вечного огня исхити.

И ныне: Богородичен: Радуйся Чистая, Бога плотию рождающая во спасение всех, Еюже род человеческий обрете спасение: Тобою да обрящем рай, Богородице Чистая благословенная.

Аллилуиа, аллилуиа, аллилуиа, слава Тебе Боже. [Трижды].

Посем ектения о усопших преждевечная: Паки и паки: Мы же: Господи, помилуй. 40. Иерей молитву: Боже духов:

И по возгласе седален, глас 5-й, за упокой:

Покой Спасе наш с праведными рабы Твоя, и сия всели во дворы Твоя, якоже есть писано, презирая яко благ прегрешения их вольная и невольная, и вся яже в ведении и не в ведении, Человеколюбче.

Слава, и ныне: Богородичен, глас 5-й:

От Девы возсиявый миру Христе Боже, сыны света Тою показавый, помилуй нас.

Псалом 50. Канон святого обители, со ирмосом на 6: и настоящий на 8.

Канон, глас 8-й:

Песнь 1.

Ирмос: Песнь возснем людие чудному Богу нашему, свободившему Израиля от работы, песнь победную поюще, и вопиюще: поим Тебе единому Владыце.

Вси помолимся Христу, творяще память днесь, от века мертвых, да вечного огня избавит я, в вере усопшыя, и надежде жизни вечныя.

Глубиною судеб твоих Христе, всепремудре ты предъопределил еси коегождо кончину жизни, предел и образ. Темже яже покры гроб во всякой стране, на суде спаси, Всещедрый.

Пределы жизни наша давай, темже усопшыя от житейския нощи, дне не вечерняго сыны покажи Господи, священники православныя, цари же и вся люди Твоя.

Яже покры вода, и брань пожат, трус же яже объят, и убийцы убиша, и огонь яже попали верныя, Милостиве, в части учини праведных.

Вся презирай плотския долги наша Спасе наш, во всяком возрасте всего рода человека, пред судищем Твоим постави неосужденны, Тебе Создателю отвечающыя.

Слава: Троицен: Три единого Естества пою Лица самоипостасная, нерожденна Отца, Сына рождагоса, и Духа Святого, безначальное Царство, власть, Божество едино.

И ныне: Богородичен: Воистинну Ты явилася еси небо на земли, большее вышняго небесе, Безвестная Дево: из Тебе бо возсия Солнце в мире, владычествуяй правдою.

Катавасия: Песнь возснем людие ...,

Песнь 2.

Ирмос: Видите видите, яко Аз есмь Бог ваш, прежде век рожденный от Отца, и от Девы в последняя без мужа заченшийся, и разрушивый грех праотца Адама, яко Человеколюбец.

Видите видите, яко Аз есмь Бог ваш, праведным судом водрузивый пределы жизни, и в нетление от тли приемляй вся, усопшыя в надежди вечного воскресения.

От четырех конец, Господи, приемляй верно усопшыя в мори, или на земли, или в реках, источниках, или езерах, или в ровенницах, снесь зверем бывшыя, и птицам, и гадам, вся упокой.

В Твоей длани всяческая Господи, предразсудил еси разрешшися в составы четыре, в пришествии Твоем собрав воскреси, вся яже в неведении и разуме, прощая тех прегрешения.

О страшнаго Твоего втораго Господи пришествия! Зане яко в виде молнии на землю пришед, воздвигнеша все создание Твое судитися: в вере Тебе тогда поживших, сретших Тя, с Тобою быти сподоби.

Слава: Троицен: Пресоввершенная Единице, Пребожественная, Троишпостасная, нерожденне Отче, и Сыне Единородне, Душе от Отца исходяй, Сыном же являйся, Существо едино и Естество, Господство, Царство, спаси всех нас.

И ныне: Богородичен: Неизглаголанное чудо Твоего Рождества Мати Дево: како бо и раждаеши, и Чиста еси в томже? Како Отроча раждаеши, и не веси искуса мужеска отнюд? Якоже весть паче естества от Мене новолепно Слово Божие рождшееся.

Катавасия: Видите видите, яко Аз есмь ...,

Песнь 3.

Ирмос: Утверждей рукою Твоею, Слове Божий, небеса, просвещением твоего истиннаго познания, утверди и нас на Тя надеющихся сердца.

Прешедшья жития течение, в славе благочестной, праведным одетися венцем сподоби Боже, и вечных благ насладитися.

Напрасно восхищенныя, попяляемыя от молний, и измерзшья мразом, и всякою раною, упокой Боже, егда огнем вся искусиши.

Присномутное жития море преплывшья Христе, в нетленное Твоего жития сподоби пристанище притещи, православным житием окормленныя.

Ихже всякое естество морских, и птиц небесных прият снеление Христе, Твоими судьбами воскреси Боже, в последний день со славою.

Слава: Троицен: Умно Божественную Единицу, в три Лица просто, купно еже пресеци, совокупляю несекомая: якоже бо скорость молнии, трисияющая видится во единстве.

И ныне: Богородичен: Недоуменное Твое чудо: без мужа бо раждаеши, и девство Твое Чистая соблюдаеши рождши. Темже ангел множество, и человеческий род поет Тя во веки.

Катавасия: Утверждей рукою Твоею ...,

Седален, глас 5-й:

Подобен: Собезначальное Слово:

Нас ради претерпевый Крест и смерть, и умертвивый ада, и совоскресивый мертвые, преставльшыися от нас Спасе упокой, яко Человеколюбец Бог, и в трепетное и страшное пришествие Твое Жизнодавче, яко имеяй множество милости, Царствия Твоего сподоби.

Слава: тойже.

И ныне, Богородичен: **С**корый Твой покров, и помощь и милость покажи на рабех Твоих, и волны Чистая, укроти суетных помышлений, и падшую душу мою возстави Богородице: вем бо, вем Дево, яко можещи, елика и хочещи.

Песнь 4.

Ирмос: **И**з горы приосененныя, слове, пророк, единыя Богородицы, хотяща воплотитися, боговидно усмотри, и со страхом славословяще силу Твою.

Отцы и праотцы, деды и прадеды, от первых и даже до последних, во благозаконии умершья и благоверии, вся помяни Спасе наш.

В горе, на пути, на местех пустых житие оставльшыя в вере, монахи же и бельцы, юношы и старцы, со святыми, Христе, всели.

От печали и радости пришедшыя ненадежно, верою абие пременившыя житие, в благоденствии пострадавшья, или злоденствии, вся упокой Спасе наш.

Яже уби мечь, и конь совосхити, град, снег и туча умноженная: яже удави плинфа, или персть посыпа, Христе Спасе наш упокой.

Слава: Троицен: **С**транно яко едино, и три, Божество, все по единому Лицу нераздельно: Отец бо, Сын и Дух Святый есть, покланяема, яко един Бог.

И ныне: Богородичен: **Н**аправи нас Дево молитвами Твоими, окормляющи обуреваемыя волною греха, во спасительная пристанища Господородительнице, избавляющи от всяких лютых.

Песнь 5.

Ирмос: **У**тренюет дух мой к Тебе, Боже, зане свет повеления пришествия Твоего, имиже убо озари ум наш, Владыко, и настави на стезю жизни.

Коегождо память умерших, благочестно от века днесь творяще Господи, прилежно ти вопием: вся упокой со святыми Твоими.

От всякаго яже приял еси рода и рода, в царех, в князех, или монашествующих православно Щедре, вечнаго избави мучения.

Всех, яже создал еси полезная ведый, имже попустил еси Господи, внезапными падежми ненадежно умерети, избави муки всякия Боже наш.

Огня приснопалящаго, и тмы несветимыя, скрежета зубнаго, и червня безконечно мучащаго, и всякаго мучения избави Спасе наш, вся верно умершья.

Слава: Троицен: Единопрестольная, безначальная, Триипостасная Единице, разделением Единство, и вопреотив Лицы Естество имущая, во едино нас совокупи хотение Твоих заповедей.

И ныне, Богородичен: Паче огнезрачных серафимов явилася еси Чистая Честнейшая, породивши сим неприступного Иисуса Спаса, воплощением обожившаго земнородных смешение.

Песнь 6.

Ирмос: Содержима мя приими, Человеколюбче, грехи многими, и припадающа щедротам Твоим, яко пророка, Господи, и спаси мя.

Смерти разрешив болезни, пострадав Начальниче жизни Боже наш, усопшья от века, рабы Твоя упокой.

Неизглаголаннкими Твоими судьбами, яже убиша чаровная напоения, отравы, костная удушения со святыми Господи упокой.

Егда судити будещи всяческим, стоящим нагим откровенным пред лицом Твоим, тогда Щедре, пощади послужившья Ти верно, Боже.

Последнею убо трубою вострубившу Твоему архангелу, воскресние жизни всех, тогда Христе рабы Твоя упокой.

От века яже приял еси верныя Боже, род всякий человеческий, сподоби во веки с служащими Ти славити Тя.

Слава: Троицен: Богоначалие Трисвятое, единопрестольное, Отче, Сыне со Святым Духом, Ты еси Бог мой, вседержительством Твоим содержи все.

И ныне, Богородичен: От корене твоего возсия цвет жизни, Иисусе праротче выспрай, спасаяй мир, от Чистыя Отроковицы Христос Бог.

Кондак, глас 8-й:

Со святыми упокой Христе души раб Твоих, идеже несть болезнь, ни печаль, ни воздыхание, но жизнь безконечная.

Икос: Сам един еси бессмертный, сотворивый и создавый человека: земнии убо от земли создахомся, и в землю туюжде пойдем, якоже повелел еси, создавый мя и рекый ми: яко земля еси, и в землю отидеши, аможе вси человецы пойдем, надгробное рыдание творяще песнь: аллилуиа.

Песнь 7.

Ирмос: В начале землю основавый, и небеса словом утвердивый, благословен еси во веки Господи Боже отец наших.

Благочестно от века преставльшихся память творяще вопием: благословен еси во веки Господи Боже отец наших.

Внезапу благочестно умершья, и от стремнины всякия падшья, древа, железа, всякаго камене, упокой Боже усопшья верныя.

В страшное Твое пришествие, Щедре, одесную овец Твоих постави, православно Ти в житии послужившья Христе, и преставльшьяся к Тебе.

В лице Христе, избранных Твоих вчини Твоя рабы, вопити Тебе: благословен еси во веки Господи, Боже отец наших.

От земли персть содетельствовавый, плоть Духом оживотворивый Спасе Щедрый, яже приял еси, упокой Боже в нестареющем животе.

Слава: Троицен: Якоже трем солнцы Божество, единым света срастворением, да воспоется, Отец, и Сын, и Божественный Дух, един Естеством, но три Ипостасми.

И ныне: Богородичен: Давидское согласно воспеваем Ти пение, гору Тя Божию нарицающе Дево, в нейже вселився плотию Слово, обоготвори нас духовно в Себе.

Песнь 8.

Ирмос: На горе святей прославльшася, и в купине огнем Приснодевы Моисеови тайну явльшаго, Господа пойте и превозносите во вся веки.

Сокрушивый первое сень смертную, возсияв яко солнце из гроба, сыны Воскресения Твоего сотвори, Господи славы, вся умершья в вере, во веки.

Безвестных и сокровенных Сведетелю, егда имаши открыти дела тмы, и советы сердец наших, тогда не истяжи слова, со всеми верою усопшими.

Егда имаши сести на престоле, и повелиши на суд предстати, собранным трубою от конец земли: тогда пощади всех Христе яко Милостивый.

Умершым напрасно от случаев, от клича же зельнаго, и скорого течения, заушения, удушения же и лягания, Господи славы, верою усопшым ослаби во веки.

Благословим Отца и Сына, и Святаго Духа, Господа.

Яко Единицу Существом пою Тя, яко Троицу Лицы Тя чту, Отче, и Сыне и Душе Пресвятыи, безначальную державу Твоего Царствия славлю во веки.

И ныне: Богородичен: Струи живыя источник запечатанный, показала еси Богородице Дево: без мужа бо Господа рождши, безсмертия верныя напояеши водою во веки.

Таже, Хвалим, благословим, покланяемся Господеви, поюще, и превозносяще во вся веки.

Катавасия: На горе святей прославльшася, и в купине огнем Приснодевы Моисеови тайну явльшаго, Господа пойте и превозносите во вся веки.

Песнь 9.

Ирмос: Проявленное на горе законоположнику во огни и купине Рождество Приснодевы, в наше верных спасение, песнями немолчными величаем.

Идеже есть веселящихся жилище святых Твоих Господи, вся от века усопшья, в вере же и надежди радоватися сподоби.

Умершья Божиим прещением, смертных громов всяких с небесе изнесенных, земли разседшейся, морю возпумевшюся, вся верныя Христе упокой.

Всякий возраст, старцы, и юныя младенцы, и дети, и ссущья млеко, мужеское естество и женское, упокой Боже, яже приял еси верныя.

От ядовитых угрызений умершья, от поглощения змиев, от попрания коней, и от удушения и обещения от искренняго, верою Ти послужившья упокой.

Коегождо по имени в вере умершья от века, и от рода родов, неосужденно предстати Тебе Христе, тогда в пришествии Твоем сподоби.

Слава: Троицен: Единый в Троице Боже, слава Тебе непрестанно, аще бо и Бог Кийждо, но един Естеством есть, Отец, и Сын, и Дух, трисветлыми свойствами.

И ныне: Богородичен: Паче ума Рождество Твое: раждаеши бо прежде Сущаго, и млеко питаеши несказанно Пищедавца миру. держиши же содержащаго вся, Христа единого Избавителя нашего Всенепорочная.

Таже, Достойно есть:

Ексапостиларий.

Подобен: Небо звездами:

Память совершающе всех усопших во Христе, и конечный день воспомянем вернии, о нас же и о оных Христа присно моляще.

Слава, и ныне: Богородичен: Сладосте ангелов, скорбящих радости, христиан предстательнице, Дево Мати Господня, заступи нас, и избави вечных мук.

На хвалитех, Всякое дыхание: поставим 4 стихи:

Стихиры во глас 6-й:

Подобен: Отчаянная:

Страшный конец смерти, и грозный суд Владыки: огонь неугасимый уготовися тамо, червь неусыпаемый мучай, и скрежет зубов, тма крошечная есть, и вечное осуждение. Темже зовем ко Спасу: яже избрал еси от привременных, упокой, за велию Твою милость.

Вси в житии оставльшиися, приидите во гробех ужасающесея, приникните и видите мира прелесть: где ныне тела доброта, и слава богатства? Где же гордость жития? воистинну суетная вся. Темже зовем ко Спасу: яже избрал еси от привременных, Упокой, за велию Твою милость.

Ныне во гроб иже на престоле, ныне иже в порфире во тлю облечесе: не ктому бо на престоле, но во гробе лежит: се исчезе царская держава. Се яко соние человеческое преходит житие. Темже зовем ко Спасу: яже избрал еси, упокой, за велию Твою милость.

Вся отселе преложившыися в надежду жизни вечныя, и житие изменившыя всяким Спасе образом, всякий чин, и род, и всякий возраст, мужы вкупе и жены, и новорожденные младенцы, яко Человеколюбец в недрах учини Авраамлих, и в местех ослабы, за велию Твою милость.

Слава: глас 2-й: Яко цвет увядает, и яко сень мимогрядет, разрушается всяк человек: паки же гласящей трубе, мертвии яко в трусе вси востанут ко Твоему сретению Христе Боже. Тогда Владыко, ихже преставил еси от нас, во святых Твоих учини кровех, согрешения их, Благосерде, презирая.

И ныне: глас 6-й: Богородичен: Ты еси Бог наш, иже премудростию соделавый вся, иже и пророки пославый нам пророчествовати Твое пришествие, и апостолы проповедати Твоя величия: и ови убо пророчествоваху пришествие Твое, ови же крещением просветиша языки, мученицы же пострадавшие получиша славу от сих, и молятся прилежно Тебе Владыце с рождшею Тя Материю: упокой, Боже, души, яже приял еси, и нас сподоби Царствия Твоего, Крест претерпевый мене ради осужденного, Избавителю мой и Боже.

Таже: Слава Тебе показавшему нам свет:

И ектения: Исполним утреннюю молитву нашу:

На стиховне стихиры, глас 6.

Подобен: Всю отложивше:

Имеяй непостижное к нам благоутробие, и источник неистощаемый божественныя благи многимилюстиве, к Тебе Владыко прешедшыя в земли живых всели, в селениях возлюбленных и вожделенных, одержание даруй выну пребывающее: Ты бо за всех пролиал еси кровь Твою Христе, и живоносною ценою мир искупил еси.

Стих: Душы их во благих водворятся.

Умерщвление претерпел еси животворное волею, и жизнь источил еси, и сладость присносущную верным дал еси, Божественным Владыко благоутробием, едине Всецедре, безгрешне: в нюже молимся, счини усопшыя в надежди воскресения, разрешение прегрешений даруй: да всеми поется имя Твое Христе, и спасени славим человеколюбие Твое.

Стих: Блажени яже избрал, и приял еси Господи.

Живыми господствующа богоначальною властью, и мертвыми владычествующа, Тебе Христе, ведуще молим: верныя рабы Твоя, к Тебе единому Благодетелю отшедшыя, Сам упокой со избранными Твоими Человеколюбче, в местех прохлаждения, во святых светлостех: воитель бо милости еси, и спасаеши яко Бог, яже по образу Твоему создал еси, едина Многомилостиве.

Слава: глас 6-й:

Болезнь Адаму бысть, древа вкушением, древле во Едеме, егда змий яд изbleва. Того бо ради вниде смерть всеродная, снедающая человека: но пришел Владыка низложи змия, и воскресение нам дарова. К Немуже убо возопиим: пощади Спасе, ихже приял еси, и со святыми покой, яко Человеколюбец.

И ныне: Богородичен глас 6-й:

Явилася еси, пребывание боголепное Пресвятая, и Бога вместила еси, и Бога родила еси неискусобрачная во двою существу, во единой же ипостаси Чистая. Того моли Единороднаго и Первороденнаго, Тя Дево непорочну и по рождестве сохраняшаго, души упокоити верою усопшыя во свете нетленные светлости и блаженстве.

Таже, Благо есть исповедатися Господеви

Трисвятое. И по Отче наш:

Отпустительный тропарь, глас 8-й:

Глубиною мудрости человеколюбно вся строяй, и полезное всем подаваяй, едина Содетелю, упокой Господи души раб Твоих: на Тя бо упование возложиша, Творца и Зиждителя и Бога нашего.

Слава, и ныне: Богородичен:

Тебе и стену, и пристанище имама, и молитвенницу благоприятну к Богу, Егоже родила еси, Богородице Безвестная, верных спасение.

И обычный отпуст.

НА ЛИТУРГИИ

Блаженна, от канона песнь 3-я, и песнь 6-я, на 6.

Прешедшья жития течение, в славе благочестной, праведным одетися венцем сподоби Боже, и вечных благ насладитися.

Напрасно восхищенныя, попяляемыя от молний, и измерзшыя мразом, и всякою раною, упокой Боже, егда огнем вся искусиши.

Присномутное жития море преплывшья Христе, в нетленное Твоего жития сподоби пристанище притещи, православным житием окормленныя.

Смерти разрешив болезни, пострадав Начальниче жизни Боже наш, усопшыя от века, рабы Твоя упокой.

Слава: Троицен: Богоначалие Трисвятое, единопредстольное, Отче, Сыне со Святым Духом, Ты еси Бог мой, вседержительством Твоим содержи все.

И ныне, Богородичен: От корене твоего возсия цвет жизни, Иисее протче разыграй, спасаай мир, от Чистыя Отроковицы Христос Бог.

По входе тропарь, глас 8-й:

Глубиною мудрости человеколюбно вся строй, и полезное всем подавая, едине Содетелю, упокой Господи души раб Твоих: на Тя бо упование возложиша, Творца и Зиждителя и Бога нашего.

Слава, кондак, глас 8-й:

Со святыми упокой Христе души раб Твоих, идеже несть болезнь, ни печаль, ни воздыхание, но жизнь безконечная.

И ныне: Богородичен, глас 8-й:

Тебе и стену, и пристанище имамы, и молитвенницу благоприятну к Богу, Егоже родила еси, Богородице Безвестная, верных спасение.

Прокимен апостола, глас 6: Душы их * во благих водворятся.

Апостол в деяниях зачало 51. (деян. 28:1-31).

Во дни оны, спасени бывше иже о Павле от корабля, тогда разумеша, яко остров Мелит нарицается. Варвари же творяху не малое милосердие нам: возгнехше бо огонь, прияха всех нас, за настоящий дождь и зиму. Сграмаждшу же Павлу рождая множество, и возложшу на огонь, ехидна от теплоты изшедши, секну в руку его. И якоже видеша варвари висящу змию от руки его, глаголаху друг ко другу: всяко убийца есть человек сей, егоже спасена от моря суд Божий жити не остави. Той же убо, оттряс змию во огонь, ничтоже зло пострада. Они же чаяху его хотяща возгоретися, или пасти внезапно мертва, на мнозе же того чающим, и ничтоже зло в нем бывше видящим, претворшеся, глаголаху Бога того быти. Окрест же места онаго бяху села первого во острове, именем Поплиа,

иже примим нас, три дни любезне учреди. Бысть же отцу Поплиеву огнем и водным трудом одержиму лежати, к немуже Павел вшед, и помолився, и возлож руце свои на нь, исцели его. Сему же бывшу, и прочии имущии недуги во острове том, приходяху и исцелевахуся. Иже и многими чesтьми почтоша нас, и отвозящимся нам, яже на потребу вложиша. По трех же месяцах отвезохомся в корабли александрийстем, подписаном Диоскуры, презимевшем во острове. И доплывше в Сиракусы, пребыхом дни три. Оттуда же отплывше, приидохом в ригию, и по едином дни возвевшу югу, во второй день приидохом в Поттиолы. Идеже обретше братию, умолены быхом от них пребыти дней семь, и тако в Рим идохом. И от тамо братия, слышавше яже о нас, изыдоша во сретение наше даже до Аппиева торго, и триех корчемниц, ихже видево Павел и благодарив Бога, прият дерзновение. Егда же приидохом в Рим, сотник предаде узники воеводе, Павлу же повеле пребывати особь, соблюдающим его воином. Бысть же по днех трех, созвати Павлу сущия от иудеев первыя, спешшимся же им, глаголаше к ним: мужие братие, аз ничтоже противно сотворь людям или обычаем отеческим, узник от Иерусалимлян предан бых в руце римляном. Иже разсудивше яже о мне, хотяху пустити, зане ни единой вине смертней быти во мне. Сопротив же глаголющим иудеем, нужда ми бысть нареци кесаря, не яко язык мой имея в чесом оклеветати. Сея ради убо вины умолих вас видети и беседовати, надежды бо ради израилевы веригами сими обложен есмь. Они же к нему реша: мы ниже писания о тебе прияхом от иудей, ниже пришед кто от братий возвести или глагола что о тебе зло. Молимся же от тебе слышати, яже мудрствуеша, о ереси бо сей ведомо есть нам, яко всюду сопровит глаголема есть. Уставивше же ему день, приидоша к нему в странноприемницу множайшии, имже сказаху свидетельствуя Царствие Божие, и уверяя их, яже о Иисусе, от закона Моисеова и пророк, от утра даже до вечера. И ови убо вероваху глаголемым, ови же не вероваху. Несогласни же суще друг ко другу отхождаху, рекшу Павлу глагол един, яко добре Дух Святыи глагола Исаием пророком ко отцем нашим. Глаголя: иди к людям сим и рцы: слухом услышите, и не имате разумети, и видяще узрите, и не имате видети. Одебеле бо сердце людей сих, и ушима тяжко слышаща, и очи свои смежиша, да не како увидят очима, и ушима услышат, и сердцем уразумеют, и обратятся, и исцелю их. Ведомо убо да будет вам, яко языком послася спасение Божие, сии и услышат. И сия тому рекшу, отидоша иудеи, многое имущее между собою состязание. Пребысть же Павел два лета исполнь своею мздою, и принимаше вся приходящия к нему, проповедуя Царствие Божие и уча яже о Господе нашем Иисусе Христе со всяким дерзновением невозбранно.

И мертвенный: Послание к солуняном первое, зачало 270 (Сол. 4:13-17).

Братие, не хочу вас неведети о умерших, да не скорбите, якоже и прочии не имущии упования. Аще бо веруем, яко Иисус умре и воскрес, тако и Бог

умерших во Иисусе приведет с Ним. Сие бо вам глаголем словом Господним, яко мы живущии, оставшии в пришествие Господне, не имамы предварити умерших. Яко Сам Господь в повелении, во гласе Архангелове и в трубе Божии снидет с небесе, и мертвии о Христе воскреснут первее. Потом же мы, живущии оставшии, купно с ними восхищени будем на облацех в сретение Господне на воздухе, и тако всегда с Господом будем.

Аллилуиа, глас 4. Блажени яже избрал, и приял еси Господи:

Стих: И память их в род и род.

Евангелие от Иоанна, зачало 67. (Ин. 21:14-25).

Во время оно, явися Иисус учеником Своим, востав от мертвых. И глагола Симону Петру: Симоне Ионин, любиши ли Мя паче сих? Глагола Ему: ей, Господи, Ты веси, яко люблю Тя. Глагола ему: паси агнцы Моя. Глагола ему паки второе: Симоне Ионин, любиши ли Мя? Глагола ему: ей, Господи, Ты веси, яко люблю Тя. Глагола ему: паси овцы Моя. Глагола ему третье: Симоне Ионин, любиши ли Мя? Оскорбе же Петр, яко рече ему третье, любиши ли Мя; и глагола Ему: Господи, Ты вся веси, Ты веси, яко люблю Тя. Глагола ему Иисус: паси овцы Моя. Аминь, аминь, глаголю тебе, егда бе юн, поясахся сам, и хождаше, аможе хотяше, егда же состареешися и воздежеши руце твои, и ин тя пояшет, и ведет, аможе не хоцещи. Сие же рече, назнаменуя, коею смертию прославит Бога. И сия рек, глагола ему: иди по Мне. Обращься же Петр, виде ученика, егоже любляше Иисус, во след идуща, иже и возлеже на вечери на перси Его, и рече: Господи, кто есть предай Тя? Сего видев Петр, глагола Иисусови: Господи, сей же что? Глагола ему Иисус: аще хощу, да той пребывает, дондеже прииду, что к тебе? Ты по Мне гряди. Изыде же слово се в братию, яко ученик той не умрет, и не рече ему Иисус, яко не умрет, но аще хощу тому пребывати, дондеже прииду, что к тебе? Сей есть ученик свидетельствующий о сих, иже и написа сия, и вем, яко истинно есть свидетельство его. Суть же и ина многа, яже сотвори Иисус, яже аще по единому писана бывают, ни самому мноу всему миру вместити пишемых книг. Аминь.

И за упокой, от Иоанна зачало 21. (Ин. 5: 24-30).

Рече Господь ко пришедшим к Нему иудеем: аминь, аминь глаголю вам, яко слушаей словесе Моего и веруей Пославшему Мя имать живот вечный, и на суд не приидет, но преидет от смерти в живот. Аминь, аминь глаголю вам, яко грядет час, и ныне есть, егда мертвии услышат глас Сына Божия и услышавше оживут. Якоже бо Отец имать живот в Себе, тако даде и Сынови живот имети в Себе и область даде Ему и суд творити, яко Сын Человечь есть. Не дивитесь сему, яко грядет час, в оньже вси сущии во гробех услышат глас Сына Божия, и изыдут сотворшии благая в воскресение живота, а сотворшии злая в

воскрешение суда. Не могу Аз о Себе творити ничесоже. Якоже слышу, сужду, и суд Мой праведен есть, яко не ищу воли Моея, но воли пославшаго Мя Отца.

Причастный: Блажени, яже избрал и приял еси Господи, память их в род и род.

Аллилуиа, [трижды]